


Memoir 50 Tahun Merdeka bertujuan meraikan kemerdekaan ke-50 negara. Milenia Muslim memaparkan pengalaman rakyat Malaysia yang melalui saat penuh makna secara bersiri sehingga Ogos ini.



Mencari Erti Merdeka

Belenggu penjajahan mental barat masih merantai kaki dan tangan, dari lagu hingga ke baju, semuanya kebaratan

“ Kita sangka kita sudah merdeka di dalam segenap aspek kehidupan. Tetapi sedar atau pun tidak kita masih terkong-kong oleh budaya tinggalan penjajah dan itulah sebenarnya masalah kita pada hari ini.”

Pegawai Agama Istana Negara, Datuk Abu Hasan Din al Hafiz meluahkan pandangannya pada satu pertemuan di pejabatnya di Istana Negara, Kuala Lumpur.

Sebenarnya, ujar Abu Hasan, ada dua perspektif merdeka dari sisi Syarak. “Pertama: hurriyyah dan kedua: Istiqlal. Hurriyyah bermaksud bebas.”

Jelasnya kalau selama ini rakyat tidak bebas mengumpul harta kini bebas berbuat demikian tanpa kongkongan. Manakala Istiqlal bererti terselamat daripada cengkaman penjajah. Kalau selama ini rakyat terbelenggu, kini boleh berdikari.

Kedua-dua konotasi ‘merdeka’ itu amat jelas pada sisi fizikal dan pembangunan negara. Tetapi bagaimana pula halnya dengan erti merdeka dari sisi spiritual rakyat Malaysia?

Meskipun negara sudah terlepas dari belenggu penjajahan fizikal, namun ujarnya mentaliti, pemikiran dan ideologi anak-anak bangsa sebenarnya masih di takuk lama.

Maka apalah ertinya kemerdekaan yang bakal mencecah usia 50 tahun 31 Ogos nanti? Untuk apa pula setiap tahun sambutan bertukar slogan dan cogankata kononnya buat peniup semangat kalau minda masyarakatnya masih terkurung dalam acuan penjajah?

“Adakah negara kita benar-benar telah merdeka? Janganlah pula kita menang sorak kampung tergedai. Walhal muda-mudinya masih dicengkam kehancuran akhlak,” tutur Abu Hasan berbaur risau.

Benar. Sesungguhnya ingatan beliau itu memang berpijak di bumi nyata apatah lagi apabila kajian Institut Integriti Malaysia mendapati hampir 30 peratus generasi muda sanggup makan suap jika berkuasa (Utusan Malaysia, 8 Ogos 2006).

Tambahan pula, laporan “Ramai homoseksual ditemani dadah” (Utusan Malaysia 10 Ogos 2006) turut mencelikkan mata kita. Seks rambang, rasuah, dan dadah bersilih-ganti membejatkan masyarakat. Justeru

PROFIL:

Datuk Abu Hasan Din al Hafiz lahir pada 13 Januari 1946 di Kampung Bohor Mali, Kayang Perlis Indera Kayangan. Anak kelima daripada 10 beradik ini menerima pendidikan awal di Sekolah Melayu. Beliau kemudiannya menyambung pelajaran ke Derma Inggeris School Kangar sehingga Mei 1960. Abu Hasan melanjutkan pengajiannya ke bidang agama apabila berpindah ke Sekolah Agama Rakyat pada 1963. Pada 1966 beliau menamatkan pengajian di Sekolah Arab Alawiah Arau. Pada 1966 hingga 1969, beliau terpilih mengikuti kursus menghafaz al Quran di Masjid Negara Kuala Lumpur. Pada 1974, beliau melanjutkan pelajaran ke peringkat Sarjana Muda Usuluddin di Universiti al-Azhar Mesir dan turut mengikuti pengajian Qiraat taraf Ijazah Sheikhul Maqari di universiti yang sama. Dianugerahkan Panglima Setia Diraja (PSD) pada 1985 dan Kesatria Mangku Negara (KMN) pada 1993. Bapa kepada tujuh anak ini pernah berkhidmat sebagai Pegawai Penyelidik Agama di Pusat Islam (1977), Imam Besar Masjid Negara Kuala Lumpur (1978) dan sejak Mei 1984, Abu Hasan bertugas sebagai Pegawai Agama Istana Negara hingga kini.



tidak keterlaluan kalau dikatakan sesetengah barisan generasi baru rupanya masih ‘dibelenggu’ meskipun negara kita telah mencapai kemerdekaan hampir setengah abad.

Dalam getar nada suaranya beralun sebak, Abu Hasan berkata perjuangan kemerdekaan membebaskan emansipasi dan pemikiran ummah masih belum selesai. Ancaman-ancaman kepada negara wujud pula dalam ben-

tuk dan wajah yang lain. “Kemajuan fizikal dan kepesatan ekonomi anak watan wajib selaras dengan penyuburan kerohanian dan itulah cabaran kita hari ini.”

Pesan beliau berikan didikan agama kepada anak-anak kita sejak kecil lagi, ibarat bidalan Melayu ‘melentur buluh biarlah dari rebungnya’.

“Pemikiran yang sarat dengan nilai-nilai positif lagi murni nescaya menyisihkan mereka daripada amalan-amalan haram di sisi agama. Berbekalkan iltizam dan semangat patriotik, kita berupaya memerdekakan sebilangan muda-mudi kita daripada terjerumus ke dalam kancang yang tidak diingini.”

Lantas, bukankah negara sepatutnya telah matang sejajar dengan usianya itu? Memperincikan takrif ‘kematangan negara’ Abu Hasan berkata, “Dari segi usia, 50 tahun adalah peringkat dewasa yang matang, sepatutnya kita sudah mahir menimbangkan perkara yang baik dan buruk.

“Malangnya hari ini kita sudah tua sebelum tua, kita sudah berpatah balik ke belakang. Patutnya ketika ini tahap agama, pemikiran dan akhlak kita sudah matang tetapi kita berundur sedikit demi sedikit. Kita banyak melakukan benda yang tidak sepatutnya dibuat oleh orang Islam.”

Atas rasa keinsafan juga cinta yang teguh pada agama bangsa dan tanahair, Abu Hasan menyeru semua pihak di Malaysia agar sentiasa bermuhasabah diri dan kembali merenung sedalam-dalamnya pada segenap kekhilafan diri yang masih boleh diperbetulkan.

“Masih belum terlewat untuk ‘memulakan semula’ apa yang kita terlepas dahulu. Jangan bertanggung lagi untuk berubah kepada tahap yang lebih baik seperti yang disarankan oleh Islam.

“Makin lambat kita berubah dikhuatiri akan muncul generasi rakyat yang tidak memahami seterusnya menghargai makna kemerdekaan.”

Kemerdekaan tegasnya, adalah nikmat Allah s.w.t. yang paling besar yang dikurniakan oleh-Nya kepada kita.

“Kerana itu balikhlah kepada erti kemerdekaan yang sebenarnya. Jangan kita engkar dengan nikmat ini. Kalau kita bersyukur dengan nikmat kurniaNya ini Allah akan tambahkan lagi nikmatnya. Kalau kita lupa nikmatNya tidak mustahil bala Allah akan menimpa kita.” **MM**